

Verum enim verò non perpetuò durabit hæc induratio (obfirmatio) Judæorum, sed quemadmodum vos occasione eorum incredulitatis ad fidem pervenistis, ita & ipsi occasione vestræ fidei ad veram fidem in Christum pervenient. Nam quod illorum incredulitatem attinet, in quâ quidem ad tempus iusto Dei iudicio derelicti sunt, occasione vestræ acceptationis, illa sanè tandem isthuc tendet, & ad hunc finem salutarem à Deo dirigetur, qui omnia in bonum convertere novit, *ut & ipsi increduli Judæi demum misericordiâ afficiantur.* Siquidem olim futurum est, ut Deus zelare illos faciat v. n. h. e. incitet ad pium zelum, quo Christianos æmulari, imò & superare in devotione erga Messiam nitentur.

Neque enim est, quod de futura Judæorum conversione dubitari debeat, siquidem Deus sapientissimus in omnibus operibus suis juxta ac clementissimus perpetuò inde à mundi origine hunc ordinem observaverit, ut quosdam homines, quos scil. prævidit tanquam omniscius fore, ut Spiritui S. suâ effrenatâ libidine atque obstinatione obicem non ponerent, in gratiam receperit, verbo suæ gratiæ cæterisque mediis salutis beaverit, quosdam autem, quos prævidit non obsequentes fore Spiritui S. reliquerit in suâ contumaciâ & incredulitate. Cæterum utrosque tum hos tum illos primùm in incredulitate invenit & ad tempus reliquit, ut postea majori zelo ad se quærendum & colendum homines incitaret. Ita etiam se res habet in hoc negotio præsentis, scil. rejectione Judæorum, & susceptione Gentilium.

*Conclufit* (detinuit) enim Deus (hos) omnes, tam Gentes quam Judæos, *in incredulitatem*, non ut causâ efficiens vel promovens hujus incredulitatis, quæ enim Deo voluptas in miserorum mortaliū interitu? sed non impediendo effrenem voluntatem, suâ quasi naturâ ad incredulitatem pronam, i. e. hominem sibi relinquendo. Nec tamen perpetuò eos in hac incredulitate permanere finit, sed tandem ex gratuita clementia eos Spiritu S. illuminat, & ad salvificam fidem convertit. Porro autem præcedaneam incredulitatem ad optimum finem sapientissimè dirigit: sic enim Deus conclufit illos omnes in incredulitatem, *ut illorum omnium miseretur*, Gentes quidem in incredulitatem vergere atque inclinatos esse passus est, jura Unglauben behalten / idque iusto iudicio, quo rebellionem & contumaciam ipsorum punivit, attamen hoc  
insuper